

**TEZAU LITURGIC**  
**9 MARTIE**  
**PR. ILIE TETERKO**

**SLUJBA**  
**SF. CUVIOS**  
**CHESARIE**  
**DE LA NAZIANZ**



**ODESSA, 2020**



**9 марта**  
**Служба Святаго Кесария врача,**  
**брата святителя Григория Богослова**

**НА ВЕЧЕРНИ**

На Господи, воззвах: **стихиры, глас 2:**

**С**е что добро, или что красно, / но еже жити  
братии вкупе, / воспевал еси давидски, Кесарие  
всеславне, / брату твоему святителю Григорию,  
аки духовному отцу послушлив был еси; // с  
нимже молися о творящих память твою.

**П**одвигом подвизался еси, / и течение скончал  
еси, / и веру, славне, соблюл еси, / и к Богу  
отшел еси, прием победы венец неувядаемый, /  
яко Вышняго Царствия наследник, // о мире,  
Кесарие, врачу милостивый, молися.

**И**мея душу милостиву, / и чист помысл, и  
сердце бодрое, / веру неблазненную и любовь  
воистинну нелицемерную, / от земли  
преставился еси к Небесным / и с лики  
праведных водворяешься. / Темже чтим тя  
священными песньми / и благочестно вси  
ублажаем, // Кесарие всеблаженне.

**Б**лаженне Богомудре Кесарие, / чистая твоя  
душа, правоверным смыслом сияючи, /  
облищает добродетелей светлостью / и озаряет  
верных исполнение. / Темже яко причастника

невечерния благодати // тя благочестно вси почитаем, досточудне.

**Слава, и ныне, Богородичен, глас тойже:**

Непроходимая врата, / тайно запечатствованная, / Благословенная Богородице Дево, / приими моления наша и принеси Твоему Сыну и Богу, // да спасет Тобою души наша.

**Или Крестобогородичен:**

Болезни претерпевши многия / в распятии Сына и Бога Твоего, Пречистая, / стеньяше, слезящи и восклицающи: / увы Мне, Чадо Сладкое, / без правды како страждеши, / хотя избавити яже от Адама земнородныя? / Темже, Пречистая Дево, Тебе молим верою: // милостива нам Того соделай.

**На стиховне Триоди.**

**Слава святому, глас 1:**

В мире Богоугодно житие стяжавши, / послужил еси Христу дела милосердия, / раздавая требующим многая дарования, / благодатию же Духа Святаго стяжал еси смиренную мудрость / и лику святых причтался еси, / тем тя молим, Кесарие всечестне, / с нимиже поминай нас, // любовь чтущих святую память твою.

**И ныне, Богородичен, глас тойже:**

Ум ангельский и человеческий / не может  
изъяснити несказаннаго и преславнаго /  
таинства рождества Твоего, Дево Богородице. /  
Тобою бо Свободный естеством / образом раба  
обнища нас ради по богатству благодати, // Ему  
же молися Всечистая, да спасет души наша.

**Или Крестобогородичен:**

Воздвижена яко виде на Кресте Агнца, /  
Непорочная Дева плачущи вопияше: / Сладкое  
Мое Чадо, / что новое и преславное видение /  
Како содержишь всяческая горстию, // на Древе  
пригвождаешися плотию?

**Тропарь, глас 4:**

Кроток, непорочен, незлобив / и преподобен был  
еси, Кесарие всечудне, / благоумилен и тих  
духом, / себе самому наложил еси миожайша  
терпения тайная / и был еси мученик без крове,  
/ темже молим тя, // твоими молитвами  
испроси нам исцеления и велия милости.

**НА УТРЕНИ**

**Канон, глас 2.**

**Песнь 1.**

**Ирмос: Грядите, людие:**

Светом озаряемь трисолнечным, / разреши  
мрак, блаженне, неразумия моего, / яко да

воспою светоносную твою память и исправление  
жития твоего.

**Е**муже служил еси, Христу, молися всегда,  
Кесарие всечестне, / да избавит от зла и  
просветит вся, поющая тя.

**С** чинми Небесными ныне ликуя, Кесарие  
достославне, / спасай любовью поющая память  
твою.

**Богородичен:** Светлыми лучами Твоего Сына,  
Богородице, / просвети омраченную мою душу,  
/ страстей смущение отжени, Твоими, Чистая,  
ходатайствы.

### Песнь 3.

**Ирмос:** На камени мя веры:

**Н**еизглаголаным и Божественным  
рукодейством очищая страсти человеков, / от  
Бога даровался еси верным врач изряден и  
молитвенник теплый, / тя чтущим, пребогате.

**М**илование стяжал еси христоподражательное,  
раздал еси богатство требующим, / Небесное же  
богатство, ходатайствующее тебе, получил еси,  
вопия, Кесарие: / несть свят, якоже Бог наш, /  
и несть праведен паче Тебе, Господи.

**Богородичен:** Яко Бога заченши, Содетеля же, и  
Зиждителя, и Господа, / роди Тя вси  
человечестии, Чистая, ублажают, / и  
Безтелесных разумная чиноначалия яко Матерь  
Божью Тя славят.

### Седален, глас 4:

Даров Божественных исполнен, врач показался еси душ и телес, / и добродетельми обогатився яве, / радуясь, пришел еси ко обителем присноживотным. / Темже, святую твою празднующе память, взываем: // помяни нас, ты чтущих, Кесарие Богомудре и пребогате.

### Слава, и ныне, Богородичен:

Пречистей Твои руке, Дево Мати, простерши, / покрый уповающие на Тя и к Сыну Твоему зовущия: // всем подаждь, Христе, Твоя милости.

### Песнь 4.

#### Ирмос: Пришел еси от Девы:

Научения родительская храня невредимо, / православным мудрованием, ты от младенства имел еси житие нескверное / и милостивен нрав, досточудне.

Ни молва мирская, ни палаты царския, ни слава временная / твоего к Богу желания преврати, Кесарие, / но благоволил еси воистинну Божественным деянием.

Боголепно скончав житие твое на земли, восприял еси ангельское подобие: / ныне же душа твоя почивает на Небесех со Христом во Царствии Небеснем.

**Богородичен:** Невесту Тя безневестну и чисто,

Чистая, селение Иисусово, / святейшую Херувим  
вемы, Богородице.

### Песнь 5.

**Ирмос:** Света подателю:

Зарею чисто Святыя Троицы просвещен,  
законом же Сея огражден, / ночь жития  
непреткновенно преминул еси, / видении  
Божественными окривляемь, блаженне, / и в  
Божественную жизнь вселился еси.

Слушай молитвы праведных Твоих, Господи, /  
услыши молитву и праведника Твоего Кесария, /  
юже приносит Тебе о роде христианском.

Душею чистою издетска страху Божию  
прилепился, / премудр явился еси не по летам и  
славен в мире, Кесарие чудне.

**Богородичен:** Дреманием уныния мя сон  
греховный постиже, Марие Богородице, /  
бодренною молитвою Твоею возстави мя к  
покаянию.

### Песнь 6.

**Ирмос:** В бездне греховней:

Царства Божия возжелел еси и, над страстьми  
царствовав, Кесарие, / по благоволению  
лучшему радость праведных получил еси.

Память твоя возсия нам днесь, / светом  
невещественным просвещающая сердца наша, /  
молебнo тя верою восхваляющих.

**В** ризу спасения облече тя, Кесарие, Господь, /  
раздрав вретиче земнаго жития твоего, / тем  
ныне тепло согреваеши недуги одержимыя  
молитвами твоими.

**Богородичен:** Милости Твоея, Богородице,  
сподоби мя, премилостиваго Спаса рождшая, /  
Своею кровию от смерти вечныя человеки  
избавльшаго.

### **Кондак, глас 6:**

**В**ерою истинною украшен быв, / просиял еси  
милостынею и добродетельным житием, /  
целомудрием и правдою, / сего ради вопием ти:  
/ Кесарие всеблаженне, / со сродники твоими  
предстоя Христу, // молися о всех нас.

### **Песнь 7.**

**Ирмос:** Да преславное рождество:

**У**ма чистотою и помысла, Богоразумия  
светлостию житие прешел еси, / непорочностью  
же телесе и девства сиянием / изрядно  
возложение явлься Всевидцу и Вседержителю, /  
Тому непрестанно воспевая: отцев, Боже,  
благословен еси.

**Б**лаженно житие твое и кончина безсмертна,  
Кесарие славне, / сего ради тя Христос свыше  
венцем украси, / нас же воздвиг вопити: отцев,  
Боже, благословен еси.

**Богородичен:** Гавриилово благовестие  
услышавши, Марие Чистая, / прияла еси  
благоволение Отчее и Духа нашествие, / и  
родила еси Христа — Слово воплощенное,  
радуясь и вопиючи: / отцев, Боже, благословен  
еси.

### Песнь 8.

**Ирмос:** Пещь иногда:

**К**оль велико отечестволюбие твое и рачение о  
больных и страждущих: / кесарям бо кесарево  
отдал еси благодушно, Богови же Богово, всегда  
песнопоя: / благословите, вся дела Господня,  
Господа.

**Л**икуют на Небесех чины Ангельстии,  
всеблаженне Кесарие, / верных же собори, на  
земли твою память похваляюще, поют: /  
благословите, вся дела Господня, Господа.

**Х**валение и честь принесем, сошедшеся, людие,  
поюще Кесария славнаго, / житием бо своим  
всечудным удивляет весь мир / и, предстоящи  
Святей Троице, вопиет немолчно: /  
благословите, вся дела Господня, Господа.

**Богородичен:** Слово Отца Небеснаго  
Единосущное, / Адамово избавление от кровей  
Твоих девственных воплотися, Дево Марие  
Чистая, / Емуже благодарственне зовем: /  
благословите, вся дела Господня, Господа.

## Песнь 9.

**Ирмос:** Безначальна Родителя Сын:

Ангели днесь сликовствуют с нами, в песнопении памяти твоей, / ты же не забуди нас, / но твоими молении от напастей, бед и скорбей спаси нас, / да ты вси, Кесарие, величаем.

Явился еси милостив и кроток, Кесарие блаженне, / сердцем же чист и непорочен, / тем Бога видел еси умными очесы твоими, / присно чистыя утешающаго.

Возсия тебе Христос, Свет незаходимый, / радость же ты подъят на Небесная, / принесл бо еси Тому житие нескверное. / Темже и достойно восприял еси плоды трудов твоих, Кесарие всеблаженне.

**Богородичен:** Глас Тебе ангелов, Пречистая, вопием: / радуйся, спасение всех человеков / и славных мучеников Божественное венчание.

## Светилен:

Предстоящи ныне Трисиянному Великому Свету / и пребывающи в неизреченней светлости со всеми святыми, / помяни всех нас, Кесарие всечестне, / память твою светоносно совершающих.

**На стиховне Триоди.  
Слава святому, глас 1:**

Владыце Христу во всем последовал еси,  
Кесарие Богомудре, / и по стезям Его Царствия  
наследник соделался еси. / Сего ради прибегаем  
к твоему, блаженне, предстательству: / просвети  
помыслы наша светом Евангельским, // да  
богоугодное Господеви принесем житие.

**И ныне, Богородичен, глас тойже:**

Святейшая всех Сил святых, / честнейшая  
всякаго творения, / Богородице, Владычице  
мира, / спаси нас, Спаса рождшая, / от  
прегрешений безмерных и бед // яко Благая  
молитвами Твоими.

**Или Крестобогородичен:**

У Креста Твоего предстоящи, Слове Божий, /  
Агница и Непорочная Мати Твоя, рыдаючи  
вопияше: / увы Мне, Сыне, како умираеши на  
Кресте? / Увы Мне, Свете Мой сладкий, / где  
Твоя доброты ныне зайде зрак, // краснейший  
паче всех человек?

[В продолжение темы почитания святых сродников  
Вселенских учителей выкладываю в «Уставные  
заметки» шестиричную службу святому праведному  
Кесарию врачу, брату святителя Григория Богослова,  
составленную в 2020 году клириком Украинской  
Православной Церкви **протоиереем Илией Тетерько**  
(Одесса)]